

呂梁洪志

(全聲玉振集)

(水衡)



山川一

馮世雍曰輿地弗易詳攷也自古在昔分土而治后世郡縣天下而三代之跡荒矣分崩離析誰與彊理然山水之秀終古弗易而呂梁之險猶夫古也志山川

呂梁洪為徐州之域蓋徐之封域甚廣東至海南至淮北至岱呂梁洪則在東南五十里洪有二上下相距可七里蓋河之下流于濟會于徐以達于淮者洪石森列如巨齒而水為所束則

呂梁洪志

一

驚湍迅波一瞬數里舟逆流而上者則以尺寸計古稱懸水三十仞流沫四十里者信彭城之喉襟而勢驟淮宿者已文山氏曰呂梁貫當中潁濱氏曰呂梁齟齬橫絕乎其前信夫洪中有諸溜乃激石而成者曰盧家溜曰門限石曰猫兒窩曰黃石溜曰侯家溜曰蝦蟆石曰邀緝石曰夜叉石曰飲牛石曰牛角硝曰轂輪石舟行經此必以群力挽之而後濟觀此可以知險矣

呂梁山在洪東連亘委蛇周數十里前有塔山

山上有寺廢矣有浮圖墮矣登而望則雲龍諸
峯蜿蜒在目下視洪流帶如也旁有鳳凰山山
有雙翅故名有泉曰虎頭西南曰勝雲山山有
石二孔水光瑩然雖霖不溢旱不枯東北曰峰
山下有七十二泉今或皆翳不食相傳張良厭
氣之所上有翻白草可入藥西北曰午山曰讀
書山不知何人讀書處

東南則有雙井村泉源出勝雲山東西二井相
向井有耐旱浚之則雨上有龍王廟雍嘗登山
而暍求漿適有山人提壺至乃瀉而呷之味甚

呂梁洪志

二

甘曰斯泉之汲也民福之南則房村客舟輳集
居民富庶亦樂土也北則雍門村即古雍門周
善彈琴能使孟嘗君悲者東南則有縣水村按
莊列孔子觀於呂梁縣水三十仞流沫四十里
故名今村或疑呂梁之水今無此勢欲擬爲石
州之呂梁及考禹貢治岐及梁爾雅梁山晉望
呂不韋之龍門未辟呂梁未鑿鄜道元之呂梁
崇竦河流激盪雖指石州之呂梁而言俱未有
縣水字今獨此洪有懸水村信哉宣父觀瀾之
地也又史記孔子將西見趙簡子至河而返則

石州呂梁亦聖轍未問津之地蘇軾贈呂梁仲
屯田詩曰官居獨住懸水村觀此亦可考矣
尉城唐尉遲恭䟽治二洪築城居之呂城呂布
與曹瞞相拒而築雲夢城梁王城在洪西北此
韓彭之遺也雍嘗登二城之墟而望焉乃喟然
歎曰嗟乎地險山川丘陵也王公設險以守其
國方二子之輔季威羽沛彭相去數百里爾乃
據險築城以當要害卒之羽挫漢興此險不爲
無少助者歷今數千祀而故垣遺壘猶與洪流
爭雄二子其善用險者哉柰何烏盡弓殳身族

呂梁洪志

三

不庇何明于用險而暗于習險也易曰習坎入
坎失道凶也重有感于二子之城

馮世雍曰呂梁山水雖不及今之一鄉而險阻
控持環引上下則隱然有虎豹重關之勢東連
齊魯北屬魏趙南通江淮西接梁楚乃敵國必
爭之地師行必據之險也王玄謨曰彭城南屆
大淮捍接邊境則呂梁以北制南之要地也尉
元曰彭城宋之要藩南郡來侵莫不因之以凌
諸夏則呂梁以南入北之要地也自漢以來未
經䟽鑿而其洶湧之流可以限敵高平之野可

以屯兵山林之藪可以伏甲故韓彭呂布之徒
皆竊據于此以固其勢而謝玄堰呂梁之水以
利師行之漕下至宋宣周武皆據有此險以取
萬全之勝然猶未可以方舟濟也迨唐之尉遲
熱火攻石修濬以殺之而流稍緩矣然猶未可
以漕舟運也至宋之元祐乃修月河堤置上下
閘而漕始利矣我

國家定鼎北都東南貢賦悉由此道五百五十年
王人拱極方貢流通漕舟客艘舳舻不絕誠要
路之形勝漕渠之會通也回視漢唐未克人和

呂梁洪志

四

徒藉地勢以自雄長者真下風矣夫在古則為
必爭之阻在今則為裕國之渠所謂伏至險于
大順藏不測于至靜之中者經國者可不加之
意哉

贊曰呂梁天成洪流禹通宣父興歎唐臣効
忠季世憑險稱于此雄嗟嗟要津鞠為戰攻
漕渠載啓四方攸同續禹之緒維皇之功
公署二

馮世雍曰公署古也古以險今以侈古以
為民今以為官陋矣夫公署者蒞政之度

也度弗嚴民何蒞焉志公署

呂梁洪分司公署在洪之東瀟舊署甚溢弘治十一年主事來天球創建坐東向西屹立洪流而泰然當之外為前門左右為鐘鼓樓中為牌坊扁曰運河通濟內進為二門巍然中峙者為正堂後左為儀仗庫右為小軒迤北北為後軒軒後為狀元亭主事來天球為大學士費公建亭後為望雲樓主事伍全建迤北為退軒公署之四周為垣中為石門左右通衢為二門門有樓扁曰通裕曰澄清則為雍所建而垣周六里

呂梁洪志

五

有樊圃之勢焉則主事陳憲之力也

呂梁洪上閘在洪之北下閘在洪之南俱永樂十六年建巡檢司在洪南洪武六年建房村驛在洪南永樂十三年建稅課局裁革于正統年今仍建夫廠二區磚廠一區藥局一區今或頽圯半存觀瀾亭一區則主事日臨僭運之所今在洪之東澣

呂梁書院主事郭持平建內有社倉二區先是洪民屢罹荒歉盜發其疆郭乃捐俸糴麥貯倉以時收斂令民每石出耗米三升小豐則取其

半無年則蠲之一倣朱子社倉法然行之未久
散或未周雍亦捐俸助之嗚呼自成周喪荒之
式廢而荒政久矣其弗講也先王有預備之政
命遺人掌委積以待凶荒后世移民粟設粥糜
下矣隋唐社倉甚為近古而世不能行何歟呂
東萊曰有志之士隨時理會故考朱子社倉記
及延和奏劄可謂有志倣古而便民者呂梁社
倉法雖未備而歛散之間民情便利散之以冬
春歛之以夏秋官無催命民無愆期使后之繼
者循之不失則十年之外可得千石之積脫有

呂梁洪志

六

凶荒洪民可以亡飢矣然豈獨呂梁能為之哉
使今日邑中之社皆能行之一遵朱子之法又
何力之不能為而凶歉之足患哉善乎朱子曰
王氏立法之意未為不善但處之以縣而不以
鄉職之以官吏而不以鄉人士君子行之以聚
歛急疾之意而不以惻怛忠厚之心今之邑神
皆能體此意而為之豈不為今日復古一快事
歟至捐俸一節亦出至誠之意初非近名程子
曰一命之士苟存心于愛物于人必有所濟又
逞恤其他也若曰治洪濟漕之外他事不與焉

則非雍之所敢知也

新橋主事溫濡建裕泉亭主事蔣益建其餘若
居家橋黃家橋李家橋黃家井皆舊貫也至于
王公集費公集龍興集則亦先時部使者所開
今爲市云

洪上是堤厥功亦不細已成化八年主事張達
修之上洪石堤長三十五丈下洪石堤長三十
六丈成化十六年主事費瑄因洪北土壩易壞
改爲石壩長一百六十五丈復于壩西築堤二
十餘丈于洪東砌石路四百二十丈夫洪岸善

呂梁洪志

七

崩司水者病焉今二公之堤堅□遠漕渠洪人
至今賴之君子曰二公可以祀茲土也夫
居家橋東有堤焉百川灌河洪流旁溢則此水
竟奔赴于下邳隄防少缺田禾盡沒主事郭持
平築堤障之水有所歸矣但堤薄而土易潰雍
重築而高厚之以爲民利考古井田之法有止
水有洩水有流水均之利于民也自穿引疏築
之政興而溝澮之法廢然皆不失古之遺意故
浚陂池通溝洫旱則引漑之溢則決注之今之
築堤意亦近此呂梁自丙戌之水民幾魚鼈雍

嘗乘舟循溝而進正見此堤之潰而佃人三時
之勞一朝蕩然可哀也已乃鳩近堤佃人分工
重築東西二堤長三百八十四丈闊一丈高八
尺又采佃人之良者為老人為總甲以時補築
之嗚呼庶幾以永斯堤也夫
淺鋪八黃鍾集淺石橋淺孟城灣淺侯家石淺
房村淺龍塘淺雙溝淺

贊曰峩峩洪署既儉而規重門長垣壯豫攸
宜亦有高廩以散以歛宮謹其藏民安其便
翼翼修堤以防潰河鴻濤既抑豐年用多

呂梁洪志

八

官師三

馮世雍曰官師者所以體國而理民也司
空之官有水道焉陂池川澤厥任重矣況
茲洪流為漕渠之要津可以一日而覆公
餼哉是故得其職則水土平否則溢則塞
可不謹哉志官師

主事一人三年更代其已任者永樂間有少卿
徐儀江西南城

郎中

王溥平城人主事蕭宏宣州人張榮湖廣人謝
遠海州人丘奎山東人俱主事科甲不可攷天

順成化間則有主事杜謙為昌黎人鍾虞為開
化人鍾宸為華亭人張達為太和人過璘為平
湖人謝敬為德州人孫佐為仁和人李瀛為宛
平人王儼為華容人費瑄為鉛山人李侃為玉
山人李浩為曲沃人李泰為新城人俱進士弘
治正德間則有安福趙瑄蕭山來天球長洲呈
甫錄廣寧張文錦桂林劉天麒餘姚姜榮安福
伍全成都李揖武進蔣益餘于陳憲萬安郭持
平招遠溫濡俱進士而雍亦得以續千僚末幸
矣夫諸君子者率皆名人碩士流風善政有裨

呂梁洪志

九

于洪者然其間有清和為政不事矯假寬惠得
民不移毀譽者亦可以想見其人矣若夫開濬
廓清之功永賴于漕事者則二三君子有焉

贊曰帝績思乂王臣是賴懷河襄流庸功維
最藹藹群英擊楫洪瀨儷景同翻皇漕清泰
夫役四

馮世雍曰夫役古也成周均人遂人之職
尚矣築臺則咏靈臺築堵則咏斯干佚道
使民民忘其勞也後世民貧役繁而役民
者多事苛暴又何恠夫民之不窮且盜也

志夫役

呂梁上閘洪夫一千五十人徐州雜差審編稍水一百二十三人月支糧二斗下閘洪夫五百人蕭縣雜差審編稍水九十人月支糧二斗其分爲牽挽之數者上五捧五百一十七人總甲一人小甲二十人中五捧五百一十七人總甲一人小甲二十人下五捧五百一十六人總甲一人小甲二十人共一千五百五十人其歲內椿草則一人該三百五十斤共該五十四萬二千五百斤遇災傷減半徵收之

呂梁洪志

十

時有爲減夫之說者馮世雍曰洪夫弗可減也呂梁二閘洪夫俱永樂初年額設載之會典者嘗命少卿廉使重臣董之責任重職掌專凡假借裁減之說不可行矣蓋上下二洪相距七里東南運艘自春徂秋牽挽不絕終日而趨已極煩勞加之洪河洶迅逆流難恬一舟百人始能利濟否則急湍失楫暗石損舟終爲運漕之累議者徒見偶爾水溢挽夫暫省遂有半減之議不知今日之溢乃藉黃河之餘波耳一旦河徙石出牽挽弗及則將如之何哉是蓋徒據目前

易見之跡而忘久大之慮者也語曰仍舊貫如
之何何必改作其是之謂乎

復有為革代役之說者馮世雍曰代役弗可革
也呂梁二閘洪夫係徐州蕭縣雜差審當編當初
賦時不遠數百里皆按圖赴役後久役戀土逃
逸日頗有司之追解文移始旁午矣正統間主
事李瀛乃為牛運之令計工食之費人買一牛
使之代人而運當時河流未溢或用牛可也及
成化弘治之年則河溢洪溜牛不可支而主事
費瑄則為顧土人替當之令夫瑄博學審謀有

呂梁洪志

十一

功于洪者民到于今祀之此必大有所見故迄
今行之不衰議者徒知革去替當之弊而不知
簡易通行之法何其迂也嘗考成周顧役之法
代嘗行之而宋之熙寧九以此為便蓋當役者
既出顧募之費則其身與官無預而可以自營
生理終歲之間不致奔疲于百里之征矣替役
者恃其土著之便受其顧價而專代一年之役
是雖非差役之正而彼此兩便公私無害亦揀
時之良法也且督治有法治受價有約重當有律
無敢叛者今之洪夫大率類此因而行之可也

使行之有妨或悞我漕規則數十年豈無明斷者爲之一更定哉蓋天下之事可因可革宜人情通土俗無害于義者因之可也況兩河連年水旱一人恒編二役當役者雖出顧募之費而洪夫差編之外又有雜差之必當者替當者雖以身代役而利其費然本身正差亦不能免亦未免顧人代役也是則戶無遺差差無遺丁豈呂梁之替當者獨爲無役之民而後爲之哉易曰通其變使民不倦其是之謂乎嗚呼世之不知古敝則然矣使今之役人者如父母之令其子

呂梁洪志

十三

弟役于人者如手足之順腹心則當役之民雖遠在千里可按圖召之久而不逸矣又何必曰顧曰替之紛擾爲也

嘉靖五年徐州有司者欲將洪夫裁減五百名編充驛遞應付雍嘗申呈

大司空趙西峰公續蒙劄付云呂梁二洪係運道襟喉之地以此額設洪夫一千五百五十人欽除主事一員督理洪事係是

國朝舊規明載會典豈可擅更近年雖稱西水泛漲安能保其終無變遷一旦水落石出貢運

盛行入夫數少不無悞事况驛遞夫役當在入
站地畝內僉洪夫當在雜役內僉自有定規今
有司擅議變法本當參究但事未行姑容改正
嗚呼可謂知大體者矣

贊曰洪濤雷奔漕艘雲集匪力曷通匪衆曷
濟巨鐘欲鳴乃惜寸本少紓未益大規或損
嗟嗟群議訶然弗詳河徙石出無補漏觴
漕渠五

馮世雍曰漕運重于國也尚矣東南運舟
貢艘濟自呂梁而通輸于京師者歲不下

呂梁洪志

十三

數十萬壯哉斯洪其漕之要渠乎是故計
東南之舟數而洪職不可廢洪夫不可減
也明矣志漕渠

南京每年進貢船隻過洪者其一則司禮監曰
神帛筆料其二則守備尚膳監曰鮮梅枇杷楊
梅鮮笋鱖魚其三則守備不用冰者曰橄欖餅
茶木犀榴柿橘其四則尚膳監不用冰者曰天
鵝醃菜笋蜜櫻蘇糕鵪鶉其五則司苑局曰芋
薺芋薑藕菓其六則內府供用庫曰香稻苗薑
其七則御馬監曰苜蓿後加以龍衣板方等船

而例外者亦多夫物數以三十而舟則以百艘
此固舊規也今則濫駕者不減千計矣嗚呼豈
特洪夫之勤哉兩河運送夫役其困可知矣
天下十總糧船每年過洪者一萬二千一百四
十三隻其一則南京總曰旗手衛羽林左衛金
吾前衛府軍左衛瀋陽衛應天衛以及興武衛
共十三衛其二則中都留守總曰鳳陽衛懷遠
衛留守中衛長淮衛以及潁上所共十二衛其
三則南京總曰留守左衛虎賁右衛錦衣衛鷹
揚衛以及虎賁左衛共十九衛其四則浙江總

曰杭州前衛紹興衛寧波衛處州衛台州衛以
及海寧所共十三衛其五則江北直隸總曰淮
安衛大河衛徐州衛以及歸德衛共八衛其六
則江南直隸總曰鎮江蘇州太倉鎮海等十一
衛其七則江北直隸總曰揚州通州泰州鹽城
高郵等十衛其八則江西總曰南昌袁州贛州
安福等十二衛其九則湖廣總曰武昌岳州黃
州蘄^州荊州等十二衛其十則遼洋總曰水軍龍
龍江廣洋等十三衛是皆洪夫所以效牽挽之
力以供王人之役有自春徂秋舳舻千里帆檣

蔽江誠哉多小夷之甲兵壯中國之形勝者猗
與盛哉

江東民運白糙粳糯每年過洪者曰常州府及
武進等四縣曰蘇州府及吳江等六縣太倉州
曰松江府及華亭等二縣曰湖州府烏程等五
縣曰嘉興府及嘉興等七縣共糧一十八萬八
百六十餘石則以民舟運之不下千餘艘焉嗚
呼東南民力盡矣尚思所以甦之者
馮世雍曰余乘盛夏時登呂梁山遂至勝雲山
諸峰俯觀淮邳徐泗及南來運舟過洪梁者乃

呂梁洪志

十五

嘆曰盛哉洋洋乎水之為利也我國家運漕
之法盡之矣洪武初年四方貢賦漕于江左三
十年始開海運以供遼東運餉及永樂初年則
漕引江南之粟一由江入海出直沽口白河運
至通州一由江渡淮入黃河至陽武縣陸運至
衛輝府由衛河運至通州九年濬元會通河以
達漕舟于京通十三年乃罷海運悉從內河一
濬真楚諸湖引江舟入淮再濬徐呂二洪引淮
舟入濟最後疏汶河達清衛漳御而濟舟長抵
于直沽矣至于漕運之規隨時更變蓋國初

海運猶因元之故也海運不給于是濟之以陸運陸運未便于是繼之以兌運兌運未通于是加之以長運所謂長運者由江入淮由淮入濟由濟入直沽之舟也千里帆檣三時不絕于以見國家統御之廣東南財賦之盛永國脉而壯國威者在此舉矣豈前代所能及哉然富盛之餘民財必耗征役之數民力多窮故食粟之士不節何以紓東南之財逋負之累不拯何以紓漕卒之苦濫駕之禁不嚴何以恤兩河之夫黃河之溢未平何以祛淤塞之患所謂圖久安

呂梁洪志

十六

長治之術于雍熙豐碑之日庶運事有賴而河道無滯矣經國者其長計熟慮之哉

贊曰於維洪梁濟通利遠解貢糧儲歲事是續江東白粳亦與牽輓洋洋漕規千祀弗緩揚園之道畝丘所加長慮補輔鄙言助車祠宇六

馮世雍曰祠宇所以棲神而用饗也古稱有功德于人能恤災捍患者則祀之否則不經撤之可也呂梁列祠有可祀之義焉君子弗之瀆也志祠宇

關尉廟在洪之南元皇慶二年建關羽尉遲皆有功于呂梁者有司春秋以少牢祭之關尉碑堂碑乃元學士趙孟頫撰文翰夔美世皆重之先在洪西墟里中雍見而弔之乃卜遷于河之東澣重構堂而記之費公祠主事費瑄成化間來理洪事有惠政民立生祠繪像祀之君子曰深矣費子之得民也可以觀政矣天妃廟金龍廟皆水神也亦祀之東有彌陀寺頗弘敞為

呂梁洪志

十七

聖節習儀獻祝之所

贊曰魏魏關尉血食洪梁炳炳趙文漕事用光費政以惠君子祀之神道不忒庶民庇之

馮子所撰凡八篇余採其六篇付刻之取多要也嘉靖庚戌夏五謝湖隨筆

呂梁洪志終



128